

**■ COLUMNA**

# Solidaridad na duess betg esser in sforz

DA GIUSEP NAY

Per cletg è dentant vegnì mussà durant las davossas emnas en tuttas gasettas ed emissiuns cun tut la clezia necessaria ch'ils arguments dals aderents da l'iniziativa No-Billag, che han ditg manà burgaisas e burgais en errur, na sa basan betg sin fatgs, mabain èn cunzunt cun lur plans B chastès en l'aria. Votantas e votants fan bun da sa concentrar uss sin l'essenzial. Quai è tar ina iniziativa populara federala adina tge ch'ella vul midar vi da nossa Constituziun federala sco suprema lescha. Decisiv è il text nov da quella proponì cun l'iniziativa e n'èn betg decleraziuns dad iniziants ed iniziants che na sa basan betg sin quel u dian il cuntrari da quel text.

L'iniziativa No-Billag na vul betg mo scumandar las taxas Billag, mabain era tuttas subvenziuns a radio e televisiun. Ed ella vul era, cun strihar l'al. 2 da l'art. 93 const. fed. abolir la basa costituziunala da la SSR. Radio e televisiun n'han quatr betg pli da contribuir «a la furmaziun ed al svilup cultural, a la furmaziun libra da l'opiniun sco er al divertiment». Els n'han betg pli da resguardar «las atgnadads dal pajais ed ils basegns dals chantuns». Els n'han betg pli da preschentar «ils eveniments a moda correc-



ta» e betg pli d'exprimer «adequatamain la diversidad da las opiniuns». Quell'incumbensa da la SSR, ch'è sia basa d'existenza, croda davent cun l'iniziativa, uschia ch'ils aderents da l'iniziativa na san betg pretender il cuntrari.

Senza taxas da recepziun u subvenziuns e senza sia basa legala na sa e na dastga la SSR gnanc exister vinavant. Tgi che di gea a quella iniziativa destructiva fa perquai ch'i vegn a dar neginas emmissiuns dad SRF, RTS u RSI e cunzunt naginas dad RTR pli. Lur service public cun cultura e furmaziun en tuttas quatter linguas naziunalas e cun reportaschas equilibradas e retschertgadas seriusamain n'è simplamain betg pli pussaivel. Medias intransparentas dad editurs privats na san e na vulan era betg remplazzar quai, mabain han lur agens interess. Ed ils uschenumnads mediums

socials dal tuttafatg nuncontrollabels vegnan a dominar la scena anc dapli. Da quai ston Svizras e Svizzers e surtut Grischunas e Grischuns esser conscients.

Infurmaziuns objectivas e fidadas èn la garanzia per ch'ina democrazia directa funcziunia era democraticamain. Per mantegnair quai e per salvar nossa Svizra quadrilingua e culturalmain uschè multifara è nossa SSR pli che impurtanta. Ella è il resultat da nossa convivenza solidarica ed en medem mument ina gronda garanzia persuerter. Quels che vesan la taxa Billag sco ina taxa da sforz demussan mo che quella solidaridad n'è per ella u el betg ina valor svizra che sa chapescha da sasez, uschi-glio na vegnissi betg discurri da sforz.

I fa be surstar tut tgi che èn er en noss chantun triling cun las minoritads da Rumantschas e Rumantschs e da Grischunas e Grischuns en nossas vals da lingua taliana, las pli avisdas sin solidaridad, pronts d'acceptar ina iniziativa che destruescha quella en il mund medial il pli impurtant en noss dis.

Quellas minoritads dumondan cun tut dretg solidaridad e vegnan er a sa mussar solidaricas cun dir in cler Na a l'iniziativa.